



“ Dakung mangingilad si Duterte sa pagpatu-ong maka-mag-uuma siya ug alang sa re-porma sa yuta. Laraw niyang bungkagon ang panaghiusa sa masang kabus sa kabanikanhan ug piangan ang ilang kusog nga mosukol ug panalipdan ang ilang interes ug kaayuhan.

Isalikway ang pagpangilad ug pagpanglupig!

Mensahe alang sa masang kabus sa kabanikanhan ug kabukiran

Partido Komunista ng Pilipinas

Oktubre 7, 2019

Pagpangilad ug pagpanglupig. Kini ang adlaw-adlaw nga dala ni Duterte ug sa AFP/PNP sa masang naglisud sa mga kabanikanhan ug kabukiran. “Kalinaw” ug “Kahusay” ang saad, apan pulos kabangis ug kalisod ang bunga sa walay puas nga gyera batok sa katawhan. Dili matabunan sa mga pakitang-tawo nga “serbisyo” ang malukpanong kalisod ug kawalay panginabuhian bunga sa pangpangilog ug pagpalayas sa yuta diha sa katawhan.

Hinungog ang ginaingong pipila ka liboan ang “misurender” kang Duterte. Mga armado ba sila, mga kriminal o adunay mga kaso? Ang tinuod, 99% kanila mga ordinaryong mag-uuma, mamumuong panguma ug mga simpleng nangunabuhin. Gilingla, gihadlok o gipugos sila: gipalumbay sa meyor aron modawat og bugas ug delata, ginapapirma sa blangkong papel, ginapasalmot sa “dayalogo” ug uban pang pagpanikas, aron pagawasong “misurender” sila.

Dakung hinungog usab ang pasundayag sa AFP nga “persona non grata” (o pagdeklarang mga “tawong gidid-an sa lugar”) ang Bagong Hukbong Bayan (BHB) ug mga “grupong maka-Walhon.” Kinsa ba ang tinuod nga gikasilagan sa masa? Dili ba ang mga abusadong sundalo: nakangisi kung moatubang sa midya, apan mogawas ang bangkil

kung walay kamera? Ang tinuod nga laraw sa AFP mao ang ipiton ug bungkagon ang mga organisasyon sa katawhan. Ginalambigit sila sa BHB bisan og wala silay krimen o kaso nga gisang-at sa korte.

Ginainitan sa AFP ang katawhan ug ang ilang mga kahugpungan tungod kay kontra sila sa mga abuso sa AFP. Kontra sila sa pagkampo sa mga sundalo sa sentro sa mga barangay nga nagadala og peligro, kahadlok, kasaba, bisyo ug kalisang sa katawhan.

Dakung pabug-at ang maong mga pakana sa katawhan. Gikan kini sa pondo sa katawhan apan ginapangwarta-han sa mga dunot nga upisyal sa AFP. Lakip dinhi ang E-CLIP nga nagsaad nga maghatag og P65,000 sa kada “misurender.” Daghan ang kaso nga wala ni piso ang midagpi sa ilang palad.

Aduna usay pipila nga nakadawat lamang og P5,000 sa dagway sa motorsiklong pagahulugan. Gatasan ka milyong pisong pondo ang gibulsa sa mga hakog nga upisyal ni Duterte (sama usab sa kaylap nga sistema sa pagpangawat sa 4Ps). Mas daghang “misurender,” mas daku ang maku-rakot.

Dakung negosyo usab ang mga gasto kaayo nga pasundayag sama sa ginapahimong “pabalay,” “pagsuroy sa Hongkong” ug uban pang kabuang. Ang tinuod, imbes nga pabalay, adunay mga kaso nga ang mga “misurender,” ilabina ang mga lalaki ang ginakural nga daw mananap sulod sa mga kampo militar. Pugos nga ginapagawas sa AFP/ PNP nga suportado sa katawhan ang ilang gyera batok sa BHB. Ang tinuod, ang masa mismo ang ilang ginagyera. Ang masa ang labaw nilang ginahasol. Ginadid-an sila nga magtrabaho sa uma o mogawas sa baryo. Ginatsekpyont ug ginablokeyo ang ilang pagkaon. Ginakampuhan ang mga eskwelahan sa mga bata.

Kahadlok, dili kalipay, ang dala sa ilang armadong presensya sa sentro sa baryo, pagpanunog sa mga payag, pagpangutingkay sa mga balay, pagpabutog pusi, pagpanganyon, pagpamomba sa mga helikopter, bisan ang makalilisang nga pagpatuyok sa mga drone.

Pila na ba ka mag-uuma ang gipatay sa mga pwersa ug ahente sa AFP/ PNP? Sa ulahing ihap: 231. Kinsa ang makalimot sa Masaker sa Sagay, sa Masaker sa Lake Sebu, sa 14 nga gipatay sulod lamang sa usa ka adlaw sa Negros? Dili sila NPA. Wala silay pusil. Apan misukol kuno sila.

Mga mini nga pasundayag ang “su-render” ug “persona non grata” sa AFP/ PNP aron linglahon ang masa. ginatabunan niini ang kapakyas sa rehimeng Duterte nga pukanon ang BHB ug ang kamatuoran nga padayong nanglimbasog ang armadong pakigbisog sa Luzon, Visayas ug Mindanao.

Dakung mangingilad si Duterte sa pagpatuon nga maka-mag-uuma siya ug alang sa reporma sa yuta. Singgit ni Duterte: “Talikdi na ninyo ang NPA, sa ako na ‘mo!” samtang nanghatag og walaypulos nga mga papeles. Ginatabunan ni Duterte ang krisis nga milukop sa kabanikanhan. Gatasan ka libong mag-uuma sa humay ang ginapatay ni Duterte sa pagbaha sa imported nga bugas. Ang iyang pakana mao nga ilugon ang yuta ug ihikaw ang katakus nga mosukol sa masang kabus aron gawasnong makasulod ang mga langyawng kumpanya sa mina, plantasyon sa oil palm, mga proyektong pang-enerhiya ug panturismo, kalsada ug uban pang imprastruktura alang sa dagkung negosyo.

Laraw sa maong mga pagpangilad nga bungkagon ang panaghiusa sa masang kabus sa kabanikanhan ug piangan ang ilang kusog nga mosukol. Pugas nga ginapukan ug ginabawal ang mga demokratikong kahugpungan aron mabyaan lamang kadtong moluhod sa AFP/ PNP ug kadtong mga upisyal nga mosunod sa tanan nilang mando. Ginahikaw ang mga kagawasan ug katungod bisan og nahilakip kini ilalum sa kaugalingon nilang Konstitusyong 1987. Kini ang pasistang kahapsay nga gipahamtang ni Duterte sa tibuok nasud. Gusto niyang hikawan sa katakus ang mga tawo nga panalipdan ang ilang interes ug kaayuhan. Gikasilagan ni Duterte ang mga mag-uuma, mga Lumad, kababayan-an ug kabatan-onan nga

nagkahiusa ug mibarug.

Kung walay kusog nga mosukol ang katawhan, walay makapakgang kang Duterte nga labaw pang paantuson ang masa, palanaton ang iyang poder ug tumanon ang pangandoy niyang mahimong diktador sama ni Marcos aron kontrolon ang tanang merkado sa droga, gunitan ang tanang kontrata sa China sa pagkawkaw sa natural nga bahandi sa kayutaan ug kadagatan, solohon ang korapsyon ug padayon nga mabuhi sa walay katapusang luho.

Katawhan! Labaw nga pag-antus ug pagpanlupig ang dangaton sa masang kabus sa kabanikanhan ug kabukiran kung maghilum ug moyukbo lamang kita kang Duterte ug sa AFP/ PNP. Patigbabawan ang kahadlok! Maghiusa ug manalipod! Maghiusa ug mosukol! Unsa ang dapat natong himuon? Bawion ang mga kagawasang gihikaw! Ipakigbisog ang mga kagawasan ug demokratikong katungod. Tukuron, palapdon ug palig-onon ang kaugalingon nga kahugpungan! Kinahanglang molihok ang tibuok barangay, ang magkasikbit nga barangay ug ang tibuok katawhan.

Hilabihan ka grabe ang pagpanglupig sa rehimeng Duterte sa masang kabus sa kabanikanhan ug kabukiran. Busa, kinahanglang labaw pang panalipdan ang kaayuhan sa tanang masang naglisud. Hiniusang ipakigbisog ang pagkaltas sa abang sa yuta, pagpaubos sa interes sa pautang ug presyo sa binhi ug pestisidyo, makatarungang presyo sa humay, kopra, saging, abaka ug mga uban pang produkto sa kaumahan, katungod sa pondong pangkalamidad ug uban pa. Hiniusang batukan ang mga madaugdaugong proyekto sa mga langyaw ug lokal nga dagkung kapitalista nga nagaligis sa interes sa kabus. Hugot nga kaabin sa katawhan ang Partido Komunista ng Pilipinas. Walay kamatayon ang baruganan sa Partido alang sa interes sa masang kabus. Saad sa Partido nga labaw pang magpalig-on aron magpabiling giya, lider ug kauban sa matag higayon sa malisud nga pakigbisog batok sa mga madaugdaugon ug mapahimuslanon.

Gitukod sa Partido ang BHB isip tinuod nga hukbo sa masang Pilipino. Ang mga Pulang manggugubat niini gilingkuban sa pinakamaayo, pinakaisog ug pinakamatinud-anon nga mga anak sa katawhan. Ginangibabawan nila



Labaw nga pag-antus ug pagpanlupig ang dangaton sa masang kabus sa kabanikanhan ug kabukiran kung maghilum ug moyukbo lamang kita kang Duterte ug sa AFP/ PNP. Patigbabawan ang kahadlok! Maghiusa ug manalipod! Maghiusa ug mosukol!

ang kalisdanan, kamingaw ug tanang sakripisyo ug walang-puas nga ginahatag ang tanang kalantip ug kusog aron panalipdan ang masa batok sa pagpaantus ug pagpanglupig. Padayon natong ihatag ang tanang suporta ug paghigugma sa atong hukbo. Padayon nga pakusgon ng BHB ug iasadang ang armadong pakigbisog sa tibuok nasud aron atakehon ang bangis ug kriminal nga yunit sa AFP, PNP ug tanang armadong ginsakpan ni Duterte.

Isalikway ug batukan ang pagpangilad ug pagpanglupig ni Duterte ug sa AFP/ PNP! Batukan ang pagsiak-siak sa masa! Maghiusa ug hiniusang ipakigbisog ang demokrasya ug kaayuhan sa tibuok katawhan! Tapuson ug pukanon ang paghari sa pasistang rehimeng Duterte!



www.cpp.ph



[@prwc_info](https://twitter.com/prwc_info)



[@prwcnewsroom](https://www.instagram.com/prwcnewsroom)